

Gonzalez
aholkulari

TXILLARDEGI



ORAINTE entzun dut berria irratietan (VII-9): *González Moskun dago aholkulari.* «Transizioa» honen ongi bideratu ondoren, maisu bihurtu omen da maila internazionalan. Eta, beti ere irratiek esan dutenez, bi alorretan azaldu dio Gorbaxofi gauzak nola egin behar diren: alderdi bakarraren desgintza baketsuarenean, batetik; eta arazo nazionalen deszentralizazio abilaren bitartez irteera ematearenean.

Lehenengoa nola egin, ederki ikusi dugu hemen: alkandora urdina etxeko alasa zaharretan izkutatu; eta, besterik gabe, eta ez projektuz eta ez asmoz zipitzik aldatu gabe, beste alkandora bat jantzi, beste txaketa bat ere bai, jakina, eta «demócrata de toda la vida» bihurtu.

Bigarrenari buruz, berriz, hau esan bide dio: «hik eman zak kafea guztientzat, eta kitto». Oturuntza bakarraren sistema; gure gaztetango astelehenetan egin ohi zen «plato único» famatua. Nondik nora honi babarrunak eta hari porrusalda? Hori falta genuke!

Jakina: beheitikoak jota dagoenari ongi datorkio arroz jatea; baina hestu dabilenari... Eta diabetikoari ere gaizki bide datorkio txokolatzeko mouse delakoa jan beharra. Baina dietetiko berri hauek hori diote: «denok gara bardinak». Gartzelari nagusiari ongi doakiona, presoek ere bai. Autodeterminazioa eta Inperialismoa elkarren ukaera bera dira; garbia eta zikina elkarren aurkakakoak diren moduan. Estatuak, bai hemen eta bai Ekialdean, *Autodeterminazioaren* gainean eraiki daitezke: ala *Inperialismoaren* gainean. Gonzalezek, aisa soma zitekeenez, bigarren bidea proposatu dio Gorbaxofi.

Eta hori, jakina, «Demokrazia»ren izenean.

●EL SOL

Jugoslaviako
desafio
konstituzionala

Jugoslaviak —eta Europako segurtasunak orohar— aurre egin behar dio arazo bikoitzari, alegia, egungo estatu batasunarekin bateraezinak diren nahi independentistek eta joera zentripetu batzuei, Balkanetan aldizka sortzen diren krisien sorrerak baretu eta moztuko dituztenak. Eta probabilitate handia dago Konstituzio proposamen berriak egiteko, oraindik probatu gabeak, bi beharizan horiek era berean asetzea ahalbideratuko dutenak.

JAVIER GARCIA

FERNANDEZ / 1991-VII-9

●EL CORREO ESPAÑOL

Julio Anguitaren
ilajea

Oraingo honetan esan du, beti argudiaketa eta pentsamendu linearek, Mendebaldearen laguntza banatzearen aldeko bi

errepublika jugoslaviarrei, Euskadi eta Kataluinen independentziaren hasiera izango litzatekeela.

Baieztape hori larria baino gehiago, pentsatu gabe esandakoa da. Lehenik, Euskal Herrian eta Kataluinan minoria gutxi batzuk bakarrik planteatzen dutelako beraie independentzia. Bigarren, Jugoslaviako kasua Espainiakoarengandik oso desberdina delako.

PEDRO VILLALAR / 1991-II-9


●EL MUNDO

Guztion beldurra
oraindik sortzeke
dagoenagatik

Añamendik bete nahi duen espazioa da, «beste batzuen laguntzarekin» —ez zehaztu arren norekin—, hain zuzen ere, PSOEek bete beharko lukeena, Euskadiko iharduera politikoan, bere kide katalanek bezala jokatuko balu Autonomi Elkarte horretan.

(...)

Ikusi beharko da zer aurpegi jarriko duen Carlos Garaikoe-



JESUS FERRERO / EL MUNDO / 91-VII-9

txeak, autodeterminazio eskubidearen defendatzailea, Kepa Aulestiak esaten dienez auto-determinazioa dinamikoa dela eta ez estatikoa, eta euskaldunak autodeterminazioa estatuarekin lortu zutela.

CARMEN

GURRUTXAGA / 1991-VII-8

●ABC

Terra Lliure eta
gure «kroaziarrak»

Nazioarteko egoerak eragiten du eskemaren eraldaketan. Ju-

goslaviaren desintegrazioak sortu du aurrekasurik. Mendebaldeko potentziek, hasieran, Eslovenia eta Kroaziaren berreizketa bermatzearen alde azaldu dira.

(...)

Madrilek eskuak garbitzeko joera du. Ona da Serbieraz ez jardutea Kataluinan, baina espainiarrak egungo bere katalan kokaeragatik egin bidezko kexuek adierazten dute, Gobernuak axolagabekeria gutxiagorekin hartu beharko litzukeela.

LORENZO

CONTRERAS / 1991-VII-9

Bi gauza falta

EUSEBIO OSA



EGUERDIA da. Bi neskak datozkit korrika, kalea gurutzatuz. Harrapatu nauten: *El Mundo* ikusi didate galtzarpean, erosi berri berria. Hau bigarrena da. Lehena, goizeko lehen orduan erosia eta euskaraz irakurria dut. Gordean daramat, beraz. (Beloki jaunak ni ere sartu ote nau euskarazko egunkaria lehen egunkari luketen 2.000 haien artean). Inkestalariak dira.

Aurrera:

— Hemen publikatzen diren egunkari hauen artean zein duzu gustokoen?

— Aizue, baina hemen bat falta da. EGUNKARIA ez dut hemen ikusten.

— Aa..., bai, arrazoiak duzu. Guri hau eman digute eta...

Badakit *El Mundok* Bai esan diola EGUNKARIARI. Bai esan dio eta batzuren zitalkeria salatu du. Baina inkesta hau prestatu dutenak ez dira enteratu euskarazko egunkaririk badagoenik.

— Zer duzu gustokoen, informazio lokala, nazionala...

— Aizue, zein nazio da hori?

— Ba... uste dugu Espainia izango dela, baina jakina...

— Ondo uste duzue. Baina hor nazio bat falta da. *El Mundok* bere sailetan, Euskadikoak eta Espainiakoak banatzen ditu. *El Mundok* bere inkesta-presetatzaileak erreziklatu beharko ditu, hurrengoan bi detaile horiek ez daitezkeen falta izan.

Daukagunaren eta garenaren ukoa jasaten segi beharko dugu. Halere, uko hori etxekoengandik, hots *El Mundokoak* baino etxekoago ditugunengandik, jasotzen denean, askosaz mingarriagoa izan ohi da.

Koalizio
Saindua

Ez, ez pentsa izenburu horrezaz PNV-PSOEek osatua aipatu nahi duanik. HBz ari naiz, zeren aspaldion agertu izan diren zenbait idazki irakurrita bai bait dirudi HB hori Andre Mari Zuria baino zurixeago ta garbixeago dela.

Ez dakit baina, Gangoat baten gutunak eta Hernani aldeko beste bik aintzinako «Punto y Hora» argitara ohi ziztuzten idazki panfletario haiek ekarri dizkidate gogora. Ikusi nahi ez duena baino itsu itsuagorik ez omen dago ta idazle-artikulugile batzuk trebeak dira beren alderdiaren okerrak besteei bizkarreratzen.

Gaiztoak, berriz ere, EAKoak. Bi suen erdi erdian direnak, hain zuzen. Espainolisten ustez

HBren aldekoak direlako eta HBkoen ustez, bada, beraiek ez diren guzti guztiak gaizto gaiztoak direlako.

HBkoek iradokimen zerutiarrez bideraturik iharduten dute, ez da hala? Baina politikan ari denak eta ez denak, noizbait, eskuak busti/zikindu behar ditu. Orain eta hemen, Gipuzkoan zein Nafarroan HBren esku dago gobernu berrien kolorea hautatzea. Daltonismoak jota ote dau-de?

Negar/irri eragingarria, «patetikue», EAKo «baseei» egin ohi dizkiguten deiak. Sinesteak ere lana duelako gu abertzaletzat gaituztena. Eskerrik asko!

Lerro laburrok idatzitakoan Murua «ohia» dela entzun berri berria dut. HB, beraz, «PSOEren morroi bihurtu da». Eskerrak, bertzenaz Imanoli botoa emanda

zer eskubidez harrikatu-ko lukete La Salve egunean?

Azkenik, eta HBren arrazoiemenduari atxikiz, EGUNKARIAK bihar honako izenburu hau idatzi behar luke: «EAK PSOEren neurriko politika egin dezala diputazioan utzi(ko) du HBk».

ENENKO IÑARRONDO
LAUDIOKuerda
gehiegi
Cuerda-
rentzat

Kazetari politiko paktistak eta, nola ez, PNVko buruzagiak jo eta ke ari dira biztanleen buruak nahasten, justifikatu nahian PSOEren egin dituen paktuak Maiatzeko hauteskunde ondoan.

Harrigarriena da sal-tzen zaien gezurra jende ugariak onartu egiten duela eta ikusita ziria sartzeak nolako fruituak ematen dizkien, pentsatzekoa da horrela jarraituko dutela.

Labur esanda, Arabako Diputazioako lau euskal alderdien junteroak (zoritarrez lauei ezin diegu deitu abertzale) alderdi espainolistentak baino gehiago dira eta berdin gertatzen da PSOEri PNVek eman dizkion alkatetzak, besteak beste: Donostia, Barakaldo, Eibar, Irun, Errenteria, Portugalete, Santurtzi eta Arrasate, azkenengo hau lortu ez badute ere.

Arestian agertutakoaren arabera zalantzarik ez dago kuerda garestiegia dela Cuerda jaunak Gasteizko Udaltzaia mugiarazteko eta hori ukaezina denez, argi dago PNVren helburua

abertzalei beste astindua bat ematea besterik ez dela izan, bere politiko profesionala interes ekonomikoen truke.

KELMEN
SARASOLA
BILBO

Oharra:

Eritzi ezberdinek iradokitzen izan dezaten, ez da komeni makinaz idatzitako 25 lerro baino luzeago idaztea gutun hauetan. Idatzi duenaren izena, telefonoa, helbidea eta Nortasun Agiriaren zenbakia argi eta garbi agertu beharko dira gutunean. Laburra beharra izanez gero, zuzendaritzak bere eskutik izango du horretarako eskubidea.

Administrazio Kontseiluko Lehendakaria:
MARTIN UGALDE

Kontseilu Editorialeko Lehendakaria:
JOAN MARI TORREALDAI

Kontseilari Ordezkarria:
JOXE MIEL ZUMALABE

Gerentea:
INMA GOMILA

Zuzendaria:
PELLO ZUBIRIA

Zuzendariordeak:
NEREA AZURMENDI
LUZIAN ETXEHARRETA
INAKI URIA

Publizitatea:
KORNELIO ROTETA

Egunkaria

Batzorde Parekidea: 72564 E
Lege Gordailua: SS 800/90

HELBIDEAK

Egoitza soziala, Pulizitatea eta Administrazioa: Antso Jakituna, 16-1. / 20.010 Donostia / ☎ 46 90 00 / Faxa: 45 59 57

Erredakzio eta Tailerra: ANTZA S.A. Industrialdea 01-02 Pabilioak / 20.160 Lasarte-Oria / ☎ 37 15 45 / Faxa: 36 54 93

Araba: San Antonio, 20-1. ezker. / 01005 Gasteiz / ☎ 23 38 72 / Faxa: 23 38 73

Nafarroa: Iratxe Monastegia, 45-13. esk. / (Irrintzi dorrea) / 31011 Iruñea / ☎ 17 80 78/79 / Faxa: 17 80 77

Bizkaia: Barroeta Aldamar, 2-1. eskua. / 48002 Bilbo / ☎ 423 90 62 / Faxa: 423 94 60

Lapurd / Nafarroa Behera / Zuberoa: 2, Galuperia kaia. / 64100 Baiona / ☎ 59 59 35 75 / Faxa: 59 25 75 11